



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

7. Kalenderwoche – ab 14. Februar 2010

Bei dor Bahn bisde Keenisch

De Deudsche Bahn - Sie wissn schon, die, die friehor Reischsbahn geheeßn had un ziehmlich arm war! - die is jedzde reisch! Weil - die dud sich nähmlich jedzde sähr um ihre Fahrgäse kimmorn un bemiehn! Also, wenn irschendwo noch das alde deudsche Schbrischword - dor Gasd is Keenisch! - geldn dun dud, dann dud dähr jedzde bei dor Deudschn Bahn geldn!

Ährlisch - de Deudsche Bahn dud ihre Fahrgäse werglich wie Keenische behandln!

Un Keenische... - die wern ja Keenisch, nisch weil se besondorsch scheen odor schlaun sinn, sondorn bloß, weil dor Babba Keenisch gewähsn is un irschendwann das Zeidliche gesähschned had. So wird eenor Keenisch un dud außor dähm scheen Diddl un ooch noch das Vormeeschn ähm.

Guhd, nisch alle Keenische hamm werglich viel von ihm Babba ähm kenn... viele Keenische sinn ooch bloß arme Sägge gewähsn... weil dor Keenisch-Babba das Vormeeschn vorschield odor sonsdwie vorjuxd had... mid Mähdressn un so... - abor eischendlich solldn Keenische normal schon e bißl reisch sein, bevor se schdärm dun, damid dann dor Nachfolschor ooch e schdandesgemäßes Lähm fiehrn kann.

Jednfalls dud de Deudsche Bahn de Kundn so behandln, wie Keenische, die was geährbd hamm. De Deudsche Bahn dud Breise machn, da kannsde, wensde kee normalor Keenisch bisd, bloß neidisch zuguggn wie annre in de Ziesche einschdeischn dun - un selbor mussde midm Audo fahrn.

Normal reische Keenische kenn sich de Deudsche Bahn leisdn!

Abor ooch Keenische brauchn eene Fahrkarde!

Fahrkardnschaldor sinn nu abor kaum noch da. Un währ hads schon jemals geschaffd, reschdzeitisch bis dor Zuchabfahrn dud, eene Fahrkarde aus so eim Audomadn rauszuloggn?

Am Audomad schaffsde den Fahrkardnkoof bloß dann reschdzeitisch, wenn dei Zuch drei Schdundn Vorschädung hamm dud. Normalerweise schdehsde am Audomad un vorsuchsd vorzweifeld de Deschnig zu ieborlisdn. Wie dor ledzde Dummkobb!

Abor de Deudsche Bahn will ehm, dass de wie e Keenisch sein kannsd.

De Deudsche Bahn dud jedzde Kurse anbietn. Also, die Kurse hamm nischd mid de Kursbieschor zu dun... - nee, die Kurse sinn weeschn de Audomadn!

Ja, bei dor Volkshochschule in Nürnberg kannsd jedzde een Kurs machn, wo mor lern dud, wie mor de Fahrkardnaudomadn bei dor Deudschn Bahn bedienen muss. Beschdimmd ooch bald in Gemnidz! Un annerschwo!

Nee, du mussd disch nisch mähr ewisch rumblachn mid die Audomadn - du gehsd einfach zur Volkshochschule un machsd vier Wochn lang een Kurs - dann kannsd dir deine Fahrkarde ohne Mieke am Audomadn koofn! Souverähn wie e Keenisch!

Eduard Sachsenmeyer